



# KONTRATA SOCIALE PUKË

## RAPORT MBI MONITORIMIN E PËRMBUSHJES SË PRIORITETEVE

SHTATOR 2020-SHTATOR 2021

Viti i II-të i monitorimit

PËRGATITUR NGA:  
LËVIZJA RINORE PËR DEMOKRACI



Gender Alliance for Development Center  
Qendra Alianca Gjimore për Zhvillim





# RAPORTI MBI MONITORIMIN E PËRMBUSHJES SË PRIORITETEVE TË KONTRATËS SOCIALE VITI I DYTË I MONITORIMIT

## BASHKIA PUKË

POP – PËRBALLJA E OFERTAVE POLITIKE  
Shtator 2020 – Shtator 2021

Rrjeti “Përballja e Ofertave Politike – POP”, synon të rrisë debatin publik dhe informacionin tek qytetarët si dhe orientimin e platformave drejt nevojave dhe prioriteteve të tyre. Përmes aktiviteteve, projekti synon të forcojë demokracinë shqiptare duke nxitur transparencën dhe llogaridhënien. Përballja e Ofertave Politike - POP, është një nismë e rrjetit të organizatave të shoqërisë civile shqiptare mbështetur nga “Olof Palme International Centre” në kuadër të një programi të financuar nga Suedia: “Shoqëria Civile, Pjesëmarrja Qytetare, Llogaridhënia dhe Ndryshimi Social” dhe National Endowment for Democracy.

### Anëtarët e Rrjetit POP janë organizatat si më poshtë:

- Qendra “Aleanca Gjinore për Zhvillim, Tiranë;
- “Qendra për Zhvillimin e Shoqërisë Civile”, Durrës;
- “Qendra Rinore”, Vlorë;
- “Shoqata për Integrimin e Zonave Informale”, Kamez;
- Qendra “Epoka e Re”, Fier;
- Qendra “Intelektualët e Rinj Shpresë”, Shkodër;
- “Lëvizja Rinore për Demokraci”, Pukë;
- “Qendra Rinore për Progres”, Kukës;
- Qendra “Rinia për Integrim, Aktivizim dhe Sensibilizim”, Progradec;
- Qendra “Tjetër Vizion”, Elbasan;
- Qendra “Gruaja në Zhvillim”, Korçë;
- Qendra “Hapa të Lehtë”, Vau i Dejës.

*Ky Raport është Përgatitur nga Qendra “Lëvizja Rinore për Demokraci, Pukë” në kuadër të projektit POP “Përballja e Ofertave Politike”, “Monitorimi i zbatimit të Kontratës Sociale në nivel lokal” dhe nuk përfaqëson qëndrimin e “Olof Palme International Center” dhe “National Endowment for Democracy”. Gjetjet dhe qëndrimet në raport janë përgjegjësi vetëm e autorëve.*

## Tabela e Përmbajtjes

SHKURTIME.....	4
FALENDERIME.....	5
HYRJE .....	6
PËRMBLEDHJE EKZEKUTIVE .....	7
PROCESI I FORMULIMIT TË PRIORITETEVE TË KONTRATËS SOCIALE .....	8
MONITORIMI I Mbledhjeve të Këshillit Bashkiak pas konstituimit të tij.....	9
ANALIZA E GJETJEVE PËR SECILIN PRIORITET SIPAS KONTRATËS SOCIALE. ....	10
REKOMANDIME .....	17
ANEKSE .....	<b>ERROR! BOOKMARK NOT DEFINED.</b> 18

## Shkurtime

NE	Ndihmë Ekonomike
NJA	Njësi Administrative
URB	Zonat Urbane
RUR	Zonat Rurale
KMACP	Komisioni Mjekësor i Caktimit të Aftësisë për Punë
KEMP	Asistencë për pa-aftësi për punë
Fëmijët me AK	Fëmijë me aftësi të kufizuar
VKM	Vendim i Këshillit të Ministratave
PAK	Personat me aftësi të kufizuar
POP	Përballja e Ofertave Politike
MKR	Mekanizmi Kombëtar i Referimit
MSHMS	Ministria e Shëndetit dhe Mbrojtjes Sociale
BTF	Bashki të Forta
COVID 19	Pandemia e Virusit Korona
Kontrata Sociale	Prioritetet kryesore të identifikuara gjatë vitit 2019
LRD	Qendra Rinore Puke
GADC	Aleanca Gjimore për Zhvillim

## Falenderime

Për të hartuar këtë raport të monitorimit të Bashkisë Pukë për periudhën Shtator 2020 – Shtator 2021, bashkëpunuam me shumë aktorë e institucione. Falenderojmë administratën e Bashkisë Pukë për bashkëpunimin dhe informacionin e ofruar.

Falenderojmë qytetarët që janë pjesë e procesit të përcaktimit të prioriteteve të kontratës sociale dhe vazhdojnë të jenë pjesë e procesit përmes monitorimit, raportimit, takimeve të ndryshme që organizata lokale ka zhvilluar përgjatë kësaj kohe, anëtarët e rrjetit POP si edhe Qendrën “Aleanca Gjimore për Zhvillim” (GADC), organizata lider në “Përballja e Ofertave Politike-(POP)”, të cilët po na ndihmojnë nëpërmjet një bashkëpunimi të mire, që LRD të përmbushë detyrat e përcaktuara gjatë zbatimit të këtij projekti.

Gjithashtu dëshirojmë të falenderojmë **Olof Palme International Center** dhe **NED – National Endowment for Democracy** për ndihmën teknike e financiare, pa të cilët do të ishte e pamundur të hartohesh ky raport dhe të realizoheshin aktivitete të ndryshme nga Rrjeti POP.

## Hyrje

Qe në vitin 2019 organizatat e Rrjetit POP po zbatojnë projektin "Përballja e Ofertave Politike – POP" në 9 Bashki të vendit, Tiranë, Durrës, Kukës, Pukë, Vlorë, Fier, Kamëz, Pogradec, Shkodër. Përgjatë vitit 2019, u arrit që të nënshkruheshin Kontrata Sociale të hartuara bazuar në prioritetet e komunitetit, midis Kryetarëve të rinj të Bashkive dhe përfaqësuesve të organizatave anëtare të POP, që veprojnë në bashkitë e sipër përmendura. Bashkia Pukë nuk e ka nënshkruar si dokument, por Bashkia është njohur me të. Në vitin 2021 rrjetit POP iu shtuan edhe tre organizata në 3 bashkitë respektive, Elbasan, Korçë dhe Vau i Dejës, duke bërë të mundur zbatimin e projektit në 12 bashki në shkallë vendi.

Gjatë vitit 2020 - 2021 projekti vijoi me monitorimin e zbatimit të Kontratës Sociale në nivel lokal në kuadër të projektit "Kontrata Sociale, mjet për të forcuar marrëdhëniet mes qytetarëve dhe pushtetarëve". Gjatë kësaj nisme, POP synon që të llobojë dhe të advokojë për përmbushjen e prioritetëve të qytetarëve që janë të specifikuar në Kontratën Sociale për bashkitë: Tiranë, Kamëz, Durrës, Fier, Vlorë, Shkodër, Kukës, Pukë, Pogradec, Korçë, Elbasan dhe Vau i Dejës. Gjithashtu synon përfshirjen e komunitetit në vendimmarrje. Ky raport vlerëson progresin e bërë në realizimin e prioritetëve të Kontratës Sociale për periudhën Shtator 2020 – Shtator 2021.

Kjo periudhë përfshin aktivitetin e qeverisjes vendore, riprezantimin me prioritetet e Kontratës Sociale, takime publike në kuadër të Kontratës Sociale dhe takime me komunitetin për t'i informuar se sa është përmbushur Kontrata Sociale si dhe evidentimin e të tjera problemeve që prekin banorët si edhe monitorimin e mbledhjeve të Këshillit Bashkiak dhe të zbatimit të prioritetëve të Kontratës Sociale. Për shkak të situatës së krijuar nga COVID-19, LRD Pukë, për një periudhë të rëndësishme të vitit 2020 - 2021, ka përshtatur aktivitetet për të ndjekur reagimin e pushtetit qendror e lokal si dhe problemet e komunitetit në përputhje me protokollet e sigurisë.

### Gjatë muajve Shtator 2020 – Shtator 2021 organizata kishte si qëllim:

- Të zhvillonte takime ku do të prezantonte përmbushjen e prioritetëve të Kontratës Sociale dhe monitorimin për vazhdimin e përmbushjes së prioritetëve të tjera;
- Të monitoronte Këshillin Bashkiak dhe veprimtarinë e Bashkisë për marrjen dhe zbatimin e masave në kuadër të adresimit të prioritetëve të Kontratës Sociale;
- Të monitoronte Këshillin Bashkiak dhe veprimtarinë e Bashkisë për marrjen dhe zbatimin e masave në kuadër të fatkeqësisë natyrore për shkak të pandemisë;
- Të raportonte gjetjet dhe rekomandimet;

- Të lobonte dhe advokonte për përmbushjen e prioriteteve të qytetarëve, sidomos në kuadër të dimensionit social, transparencës dhe llogaridhënies.

## Përmbledhje ekzekutive

### Gjetje Kryesore

- Gjatë periudhës Shtator 2020 – Shtator 2021, procesi i monitorimit nga Qendra Rinore ka vazhduar njësoj si në vitin paraardhës. Bashkëpunimin me Bashkinë dhe Këshillin Bashkiak e konsiderojmë të mire dhe ata kanë pasur një qasje më të hapur në bashkëpunimin me shoqërinë civile.
- I gjithë informacioni i aktivitetit të Bashkisë është ndarë në kohë reale përmes rrjeteve online të komunikimit, duke ndikuar në mënyrë të drejtpërdrejtë në rritjen e informimit të publikut, në rritjen e transparencës dhe ftesës së hapur ndaj qytetarëve për të qenë pjesë e vendimmarrjes përmes pjesëmarrjes në takime të ndryshme konsultuese apo dëgjesa publike, duke iu ofruar të gjithë informacionin e duhur dhe infrastrukturën për pjesëmarrje.
- Vazhdon të mbetet i ulët interesi i qytetarëve për t'u përfshirë në proceset e vendimmarrjes, edhe pse të gjithë vazhdojnë të ankohen kur i preket interesi apo realizohet një investim para një tjetri ndoshta më shumë të nevojshëm për qytetarët.
- Gjatë kësaj periudhe që po mbajmë këtë raport, është vërejtur shtimi i aktiviteteve kulturore nga Bashkia Pukë, duke vënë në funksion Pallatin e Kulturës dhe Qendrën Kulturore për Fëmijë.
- Po ashtu, duhet vlerësuar kujdesi i administratës së Bashkisë për të rritur ndërgjegjësimin dhe marrë masa ndaj Covid 19 si dhe zhvillimin e fushatave për nxitjen e vaksinimit.
- Edhe aksionet për mbrojtjen e mjedisit kanë qenë shumë të shpeshta, goftë në lidhje me pastrimin, mbrojtjen e pyjeve si dhe sensibilizimin e qytetarëve për ambiente të pastra dhe të shëndetshme.
- Është vërejtur rritje e bashkëpunimit të Bashkisë me donator e biznesmenë të ndryshëm, të cilët janë ftuar për të investuar për një Pukë të zhvilluar në sektorin e turizmit.



## Procesi i formulimit të prioriteteve të Kontratës Sociale

Kontrata Sociale e bashkisë Pukë u hartua sipas një plani konkret dhe metodologjie të përcaktuar paraprakisht. U zhvilluan takime me komunitetin dhe u mblodhën të gjitha problematikat që prekin banorët që jetojnë në Pukë qytet dhe në katër Njësitë Administrative Gjegjan, Qelez, Rrapë e Luf – Qerret.

### Publikimi i prioriteteve të kontratës sociale

Çështjet e diskutuara me fokus grupet e qytetarëve janë përfshirë në katër fusha kryesore që ndikojnë drejtpërdrejtë mbi komunitetin vendor:

1. Zhvillimi ekonomik vendor
2. Shërbimet publike
3. Dimensionin social
4. Demokracia vendore

### Mbi bazën e vlerësimit të vetë pjesëmarrësve, prioritetet e komunitetit u organizuan në dy grupe:

1. **Ndërhyrje prioritare**, ku përfshihen çështjet që në këndvështrimin e komunitetit janë shumë të rëndësishme për ta dhe kërkojnë më shumë angazhim në vijim nga të zgjedhurit vendorë;
2. **Ndërhyrje disi prioritare**, që përfshijnë ato çështje që janë më pak të rëndësishme krahasuar me grupin e parë;

U formuluan dhe listuan sipas shkallës së rëndësisë nga vetë komuniteti, 14 prioritetet të cilat janë të bashkëngjitura si aneks në këtë raport.

Keto prioritetet u listuan dhe u votuan në takime me fokus grupe të ndryshme, kryesisht të rinj e gra, ku iu dha prioritet të gjitha kërkesave që paraqitën në Kontratën Sociale, e cila i është prezantuar administratës së Bashkisë, Këshillit Bashkiak dhe kryetarit të Bashkisë, në takime publike me pjesëmarrje të gjërë të komunitetit, kontrata e hartuar nga Qendra Rinore ka shërbyer që, në planet e Bashkisë të futen pikërisht këto prioritetet, po ashtu edhe në planet e investimeve edhe në detajimin e prioriteteve të përcaktuara nga administrata e Bashkisë dhe që miratohet në Këshillin Bashkiak në fillim të vitit.

Pas monitorimit të vitit të parë të kësaj kontrate (Shtator 2019 – Shtator 2020), ku kishte një realizim me rreth 50 % në listën e prioriteteve që Bashkia ndërmori për t'i adresuar gjatë vitit 2020 – 2021, u vërejt se është arritur plotësimi 70 % i këtyre prioriteteve që parashikohen në Kontratën Sociale, kryesisht prioritetet që kanë të bëjnë me përmirësimin e infrastrukturës

rrugore, furnizimit me ujë të pijshëm, kanalet vaditëse, kanalizime të ujrave të përdorura, dhe një rëndësi e veçantë po i jepet zhvillimit të turizmit si një fushë shprese për të rinjtë dhe komunitetin në përgjithësi.

## Monitorimi i mbledhjeve të Këshillit Bashkiak.

Qendra Rinore ka monitoruar të gjitha mbledhjet e Këshillit Bashkiak për periudhën Shtator 2020 – Shtator 2021, të cilat për shkak të situatës së krijuar nga pandemia e Covid 19 në shumicën e rasteve janë zhvilluar online ose pa praninë fizike të qytetarëve por me mundësinë për t'i ndjekur ato në platforma të ndryshme. Këshilli Bashkiak përbëhet nga 15 anëtarë, nga të cilët 3 gra e 12 burra dhe të gjithë i përkasin krahut të majtë politik.

Në çdo mbledhje të Këshillit Bashkiak ka qenë pothuajse i njëjti rend dite dhe ne këtu po sjellim mbledhjet e Shtatorit 2020.

Me datën 04.09.2020 u zhvillua mbledhja e radhës e Këshillit Bashkiak Pukë.  
U miratuan:

- Projekt-vendimi për miratimin e dhënies së ndihmës ekonomike, duke përdorur deri në masën 6% të fondit total të ndihmës ekonomike të muajit Korrik 2020.
- Projekt-vendim për një shtesë në vendimin nr.47, datë 17.12.2004, "Për emërtimin e rrugëve, shesheve dhe institucioneve të Bashkisë Pukë".

Mbledhja e Këshillit Bashkiak Pukë, datë 29.12.2020.

Në mbështetje të ligjit nr.139/2015, "Për Vetëqeverisjen Vendore", neni 53, pika 3, shkronja "a" si dhe të nenit 56 të VKB nr. 14 datë 30.06.2020 "Rregullore e funksionimit të Këshillit të Bashkisë Pukë" dhe në zbatim të Urdhërit nr 633, datë 17.11.2020 "Për ndalimin e grumbullimeve në vende të mbyllura apo të hapura" nga Ministria e Shëndetësisë dhe Mbrojtjes Sociale ju njoftoj se, mbledhja do të zhvillohet në datën 30.12.2020, ora 09:00 nëpërmjet platformës online Skype. Rendi i ditës do jetë si më poshtë:

- Projekt-vendimi për miratimin e dhënies së ndihmës ekonomike, duke përdorur deri në masën 6% të fondit total të ndihmës ekonomike të muajit Nëntor 2020.
- Projekt-vendim për miratimin e paketës fiskale 2021.

- Projekt-vendim për miratimin e nivelit të pagave të punonjësve të Bashkisë Pukë, Njësie Administrative, institucioneve të varësisë dhe funksioneve të deleguara për vitin 2021.
- Projekt-vendim për miratimin e programit buxhetor afat mesëm 2021-2023 dhe buxhetit të vitit 2021.
- Projekt-vendim për procedurat e prioriteteve për investime e shërbime për vitin 2021.
- Projekt-vendim për trajtimin me bursë të nxënësve të shkollave të mesme profesionale për vitin shkollor 2020-2021.
- Projekt-vendim për trajtimin me bursë të nxënësve të akomoduar në konviktin “Ali Bytyçi” për vitin shkollor 2020-2021.
- Projekt-vendim për miratimin për heqje nga fondi pyjor publik të sipërfaqes 0.300 ha, që do të përdoret për ndërtimin e “Hec Kaulina” Bashkia Pukë.
- Projekt-vendim për miratimin për heqje nga fondi pyjor publik të sipërfaqes 0.8903 ha, që do të përdoret për ndërtimin e “Hec Gojan” Bashkia Pukë.
- Konsultime për taksën vendore dhe dëgjesa publike për buxhetin 2021, etj.
- Për të vazhduar me miratimin e buxhetit

Njoftimi i orareve të zhvillimit të mbledhjeve të Këshillit dhe projektpropozimet sipas rendit të ditës, janë bërë të dituara përmes faqes së Bashkisë në rrjetet sociale, në këndin e njoftimit dhe njoftime përmes administratës në Njësitë Administrative, për të gjithë të interesuarit që kanë pasur dëshirë për të ndjekur këto mbledhje.

## Analiza e gjetjeve për secilin prioritet sipas Kontratës Sociale:

**Prioritet 1:** Programet e Bashkisë për nxitjen e punësimit të prioritetizojnë grupet më pak të avantazuara në tregun e punës:

- Të rinjtë e sapo diplomuar
- Gratë
- Gratë viktimat të dhunës në familje
- Nuk ka akoma një program për nxitjen e punësimit me fokus keto tre grupe, por vërehet punë në zhvillimin e sektorit të turizmit por jo se sa specifikisht janë përfitues të rinjtë apo gratë në këtë sektor.
- Vlerësojmë punësimin e të rinjve në sektorin publik, afërsisht 40% e punonjësve në sektorin publik të punësuar në vitet e fundit janë të rinj, 22-35 vjeç.

- Është prezantuar një projekt që do fillojë, për ndërtimin e një pike të grumbullimit të produkteve lokale që do të nxiste punësimin e grave kryesisht, i cili mund të nisë në muajin Mars 2022.

## **Prioriteti nr. 2**

### **Rregullimi dhe ndërhyrja në rrugët në nivel Bashkie**

#### **Në infrastrukturën rrugore u investua dhe u përmirësuan:**

- Është realizuar shtresa me asfalt e unazës të qytetit Pukë;
- Është realizuar investimi në sistemimin dhe asfaltimin e rrugës së lagjes “Kukaj”;
- Është realizuar projekti i ndriçimit në rrugën e lagjes “Zezaj” në qytetin e Pukës;
- U sistemuan sipërfaqe të gjelbra dhe ndriçim i qendrave të Njësive Administrative Luf e Gjegjan.
- Është përmirësuar dhe rritur kujdesi i mirëmbajtjes së rrugëve rurale në 4 Njësitë Administrative;
- Është ndërtuar urë për kalimin e automjeteve në fshatin Kabash;
- Po ashtu, në disa prej fshatrave të Njësive Administrative Luf - Qerret është bërë ndërhyrje për përmirësimin e urave të këmbësoreve, të cilat kanë qenë shumë të amortizuara dhe të rrezikshme për banorët si, ura e Lajthizës në Gjegjan, ura te përroi i Rrvishtit në fshatin Midhë të Njësive Administrative Qelëz, Ura e fshatit Pla në Njësine Administrative Luf Qerret, ura këmbësore e lagjes “Kukaj”;
- Optimizimi i Rrjetit të Ujësllësit të Qytetit Pukë;
- Ndërhyrje në përmirësimin e rrugëve rurale të Njësive Administrative si, aksi rrugor rural Ukth – Buzhalë për të bërë të aksesueshëm edhe pikën turistike Maja e Murgës, rrugët e lagjes “Lejthizë” dhe lidhjen me rrugë të gjitha banesave, rruga Pukë – Kabash, Rrape – Kabash, rruga e Meqes, rrugët e fshatrave në Qelëz, segmenti rrugor Katund-lagjia “Qelesh”, sinjalistika dhe tabela për bujtina, restorante dhe parqet e Bletëve, rruga e fshatit Marrnaq dhe rruga e fshatit Plet në Njësine Administrative Luf-Qerret;
- Bashkia Pukë përvec mirëmbajtjes rutinë të rrugëve rurale, është e angazhuar përgjatë gjithë dimrit për përballimin e situatave të reshjeve, në hapjen e rrugëve nga bora, apo pastrimin e segmenteve të ndryshme rrugore nga ngricat;
- Ndërtimi i ujsjellësit Luf e Gjegjan është në proces.

**Prioritet 3:** Adresimi me prioritet i vendosjes së transportit publik, sidomos në ato zona ku ai mungon totalisht.

- E përcaktuar, dhe kur kemi pyetur na është thënë se nuk është kompetencë e Bashkisë dhe ne nuk kemi një informacion të qartë nëse është detyrë e Ministrisë së linjës. Por

fakti që nuk ka transport publik, po kthehet në problem të madh. Bashkia duhet të kërkojë një shërbim të tillë në ndihmë të qytetarëve të saj. E kemi theksuar se sa shumë do i ndihmonte gjithë zonave ky shërbim, duke filluar që në shkollimin e fëmijëve, aksesin për daljen në treg dhe shitjen e produkteve të fermave, për nevojat e përditshme etj.

**Prioritet 4:** Adresimi dhe listimi prioritar për ngritjen e shërbimeve për grupet në nevojë për shërbime të kujdesit shoqëror.

- Me mbështetjen e UNDP, është hapur Qendra Ditore për fëmijët PAK, ambiente këto të përshtatshme dhe me kushte bashkëkohore si dhe staf në dispozicion për të ofruar shërbime si, psikolog, fizioterapist, logoped. Kjo qendër ofron shërbim për rreth 60 fëmijë me probleme të veçanta dhe ka filluar shërbimin lëvizës në të katër Njësitë Administrative për t'i ofruar shërbim në banesë. Stafi dhe ambientet janë në dispozicion pesë ditët e javës me orar zyrtar, dhe ofrojnë shërbime zhvillimore, okupacionale, terapi fizike. Stafi i angazhuar pranë kësaj qendre do të ofrojë dhe shërbime këshillimore për prindërit e këtyre fëmijëve. Ky është një investim i rëndësishëm dhe që zhvillohet për herë të parë në bashkinë Pukë.

**Prioritet 5:** Ngritja e programeve dhe organizimi i fushatave ndërgjegjësuere kundër dhunës me bazë gjinore.

- Me gjithë ndërhyrjen e organizatës për të përmirësuar situatën kundër dhunës me bazë gjinore apo për të bërë funksional mekanizmin e referimit të rasteve të dhunës, vazhdon të mbetet në hije marrja e masave për këtë prioritet, Bashkia dhe punonjësit e zyrës për barazinë gjinore kanë ndërmarrë fushata të ndryshme ndërgjegjësimi, por nuk kanë një program që mund të ndihmojë, sidomos gratë në situatë dhune.

**Prioritet 6:** Unifikimi i shërbimit dhe cilësisë së pastrimit për të gjitha zonat që janë pjesë e bashkisë Pukë. Shtimi i koshave në Njësitë Administrative dhe zonat periferike ku ato mungojnë si dhe kontrollimi më i shpeshtë nga Bashkia.

- Shërbime të përmirësuara, sipërfaqe të gjelbra të shtuara dhe të mirëmbajtura, vendosje stolash, mbjellje pemësh, shërbime dekori të realizuara;
- Një kënd pushimi dhe çlodhjeje është krijuar për qytetarët si dhe një kënd lojrash për fëmijë në parkun e liqenit, i cili është kthyer në një atraksion turistik tashmë të preferuar për të gjithë vizitorët dhe banorët e Pukës.

- Është bërë evakuimi i mbetjeve inerte të depozituara në mënyrë të papërgjegjshme nga qytetarë apo biznese që kanë kryer punime të ndryshme dhe inertet më tej i kanë depozituar në kurorën me pisha pranë stadiumit të qytetit të Pukës, duke e kthyer një sipërfaqe të konsiderueshme të degraduar e dëmtuar nga mbetjet në një sipërfaqe të pastër e më vonë të gjelbëruar.
- Vazhdon të jetë problem shtimi i koshave në Njesitë Administrative dhe informim i komunitetit për mbajtjen pastër të ambienteve

**Prioritet 7:** Adresimi dhe rregullimi i furnizimit me ujë të pijshëm i shkollave dhe fshatrave si dhe kontrolli i cilësisë së tij.

- Vazhdon të mbetet problem furnizimi me ujë të pijshëm në shkollat e zonave rurale, edhe pse është një problem i relatuar ndër vite si përmes Kontratës Sociale po ashtu dhe nga vetë komuniteti prindër – mësues.
- Po ndërtohet ujësjellësi i Lufit dhe i Gjegjanit, dhe janë realizuar në masën 80 % punimet.

**Prioritet 8:** Buxhetim me pjesëmarrje në mënyrë që, qytetarët të marrin pjesë në vendimmarrjen mbi menaxhimin e financave publike të pushtetit lokal.

- Janë zhvilluar takime e konsultime për taksat, por vërehet pjesëmarrje e ulët e komunitetit, sidomos në zonat rurale. Ndryshe ndodh në Pukë qytet ku gjatë takimit të konsultimit të buxhetit, pjesëmarrja ka qenë e lartë dhe është ndjekur dhe online, ku qytetarë të ndryshëm kanë pasur mundësinë të shprehin opinione dhe të propozojnë prioritetet, të cilat janë marrë në konsideratë nga administrata e bashkisë e ngarkuar për përgatitjen e projekt - buxhetit.

**Prioritet 9:** Ngritja e akademisë sportive (zhvillimi i shumë sporteve për aktivizimin rinor)

- Është ndërtuar Qendra Sportive dhe është në dispozicion të komunitetit. Palestra e ndërtuar në territoret e gjimnazit Pukë, qëndroi për disa kohë e mbyllur dhe pa funksion përveç gjatë orëve të edukimit fizik për shkollën. Me kërkesë ndaj Bashkisë në takime të ndryshme të monitorimit të Kontratës Sociale, kemi shprehur se kjo Qendër Sportive duhet të jetë në dispozicion të komunitetit, pasi ky ka qenë qëllimi i funksionit të saj që kur është bërë kërkesa për investim dhe kur është ndërtuar. Në mesin e vitit 2021 kjo qendër është vënë në funksion të komunitetit, Bashkia ka përcaktuar një person që të kujdeset për të dhe të interesuarit ta gjejnë gjithmonë hapur dhe në dispozicion.

Grupe të ndryshme qytetarësh dhe të rinjsh e përdorin çdo pasdite për sporte të ndryshme si volejball, basketboll, ushtrime të ndryshme fiskulture etj.

**Prioritet 10:** Lobimi dhe mbështetja nga bashkia në lidhje me bursat e ekselencës.

- Është miratuar në buxhetin 2021 një shumë 200 000 L, për nxënësit e ekselencës dhe në nevojë ekonomike, por nuk është shprehur si zë i veçantë në buxhetin e Bashkisë. Dhe nuk është shpenzuar për shpërblim të nxënësve të ekselencës deri në këtë fazë të raportimit. Bashkia po bën vetëm promovimin e këtyre nxënësve përmes faqes zyrtare të facebook-ut.

**Prioritet 11:** Nevoja për hapjen e kurseve profesionale me bazë zhvillimin e aftësive për turizëm, si një fushë prioritare e zhvillimit të Pukës, duke sjellë kështu edhe rritjen e punësimit të të rinjve dhe grave.

- Nga Bashkia nuk ka një iniciativë ndërsa organizatat e shoqërisë civile kanë patur disa nisma për rritjen e aftësive të të rinjve dhe grave për punë e përgatitje që të ofrojnë shërbime të mira turistike.

**Prioritet 12:** Zhvillimi dhe identifikimi i zonave turistike, tabelat informuese, shtigjet malore, informacion i zgjeruar për zhvillimin e zonës së Pukës.

- Është përmirësuar gjendja, duke u ndërtuar me shënjime e tabela informuese shtigjet malore me rreth 25 km, dhe po punohet për promovimin e zonës dhe burimet për zhvillim të turizmit.

**Prioritet 13:** Kërkesa për të hapur një Qendër Rinore.

- Edhe pse kjo është një kërkesë e kahershme që në Kontratën Sociale 2015, ajo vazhdon të jëtë e porealizuar edhe pse është këmbëngulur në çdo takim që kemi pasur. Që pas vënies në funksion të Qendrës Sportive, është vlerësuar si një hapësirë rinore dhe pjesa tjetër është lënë pas dore.

**Prioritet 14:** Rishikimi i ndihmës ekonomike veçanërisht për gratë kryefamiljare, të divorcuara dhe ato të dhunuara.

- E papërmirësuar, zero mbështetje ndaj grave me këto probleme, ndërsa ka një rritje 2 herë të ndihmës ekonomike nga qeveria qendrore për periudhën Janar – Qershor 2021.

### **Për çështjet mjedisore:**

Bashkia Pukë ka rritur aktivizimin për mbrojtjen e pyjeve nga dëmtimet, prerjet, djegiet, shkatërrimin, po ashtu ka marrë disa herë aksione komunitare për pastrimin nga mbetjet urbane dhe fushata ndërgjegjësimi për mbrojtjen e mjedisit.

### **KANALET KULLUESE VADITËSE**

Megjithëse është bërë më herët punë në lidhje me kanalet kulluese vaditëse, aty ku janë ekzistente, në përgjithësi cilësia dhe gjendja e tyre është e mirë. Por, banorët shprehin problematikën e mungesës së këtyre kanaleve në shumicën e fshatrave, si dhe mungesën e pastrimit të tyre (aty ku ekzistojnë).

**Prioritet 9/1 komunitar:** Ndërtimi dhe rikonstruksioni i kanaleve kulluese/vaditëse në të gjitha zonat ku e kanë të nevojshme si dhe mirëmbajtja e kanaleve ekzistuese nga ana e Bashkisë. Në lagjet e Qelezit, në çdo takim banorët janë shprehur për nevojën e ndërtimit të kanaleve vaditës.

### **Në investimet e kullimit dhe vaditjes janë investuar:**

- Rehabilitimi i digës të rezervuarit të Kukajve;
- Kanali vaditës i fshatit Qerret në njësinë administrative Luf-Qerret;
- Sektori i shërbimeve ka realizuar përmirësimin e kanalit të vaditjes për 12 familje në Njësinë Administrative Gjegjan.

### **Realizime për strehimin:**

- Bashkia Pukë ka filluar shprëndarjen e apartamenteve, pjesë e kompleksit të banesave sociale ndërtuar nga “Enti Kombëtar i Banesave” në bashkëpunim me Bashkinë Pukë;
- Rikonstruksioni i ish-NSHN, ku ndodhet një pallat pranë Shkollës së Mesme "Sabah Sinani" , edhe pas rikonstruksionit familjet nuk janë kthyer ende në banesat e tyre;
- Banesat sociale ishin parë si banesa që përfitohen nga familjet në nevojë por kriteret e vendosura për përfitimin e këtyre banesave ishin për familjet që kanë të ardhura minimale rreth 15000 lek/frymë në muaj, duke vijuar kështu mungesën e banesave për



nevojtarët, që mbesin në të njëjtën situatë edhe pas këtij investimi.

### **Gjetje gjatë takimeve me komunitetin**

*Një shqetësim tjetër i hasur tek banorët është, investimi në fasada për të cilin ka banorë që shprehen se nuk janë trajtuar njësoj me banorët e tjerë të të njëjtit pallat apo hyrje. Investimi kishte për detyrë të zëvendësonte dritaret apo vetratat e ballkoneve të amortizuara me të reja, ndërkohë tek disa apartamente i kanë realizuar ndërsa tek të tjera jo, (i referohemi pallatit afër Drejtorisë së Policisë) dhe për këtë kemi dy ankesa nga banorët e pallatit.*

*Tek pallati i ish furrës së bukës, një tjetër banore shprehet se që kur u ndërtuan çatitë e reja, sa herë bie shi, në banesën e katit të parë në muret e brendshme rrjedh ujë. Edhe pse është bërë ankesë disa herë, askush nuk i është përgjigjur për problemin.*

*Siç e përmendëm, banorët që kanë jetuar në pallatin e NSHN-së, i cili iu nënshtrua rikonstruksionit, nuk po kthehen akoma në banesat e tyre duke i vënë kështu në vështirësi ata, sidomos në dimër.*

*Për çështjet e punësimit, kryesisht për të rinjtë dhe grate, nuk ka një plan të miratuar. Duke lënë si shpresë të fikur qëndrimin e të rinjve në Pukë dhe me sytë vetëm nga administrata publike e cila çdo ditë është duke u reduktuar, për shkak të largimit të popullsisë. Situata e biznesit është në nivele shumë të ulëta sa i takon mundësisë së punësimit, e sidomos periudha e Covid19 që vazhdon të jetë prezente, e ka dëmtuar rëndë edhe atë nivel që ishte arritur më parë.*

*Në zonat rurale vazhdojnë të mbeten problem kanalet vaditëse, mungesa e tregut për produktet, mungesa e kapaciteteve për aplikime në skemat mbështetëse për fermerët dhe bujqësinë e blegtorinë, subvencione të papërfituara në asnjë rast.*

*“Na ndihmoni ta bëjmë jetën më të lehtë”, u shpreh një nga zonjat në takimin që realizuam me banorët në Qelez, e cila kërkonte ndërtimin e kanalit të ujit që të vadiste tokën.*

### **Nga takimet me qytetarët dhe intervistat e strukturuar, rezulton:**

- 70% e të intervistuarve vlerësojnë punën e Bashkisë Pukë.
- 70% e personave nga zonat rurale mendojnë se investimet në zonat rurale janë minimale. Këto investime kryesisht janë në mirëmbajtjen e rrugëve, urave dhe pastrimin e disa kanaleve kulluese.
- 75% mendojnë se nuk ka programe për të rinjtë, me synim punësimin apo mbështetjen me programe të specializuara për mbështetje financiare për start up-et rinore, nga Bashkia Pukë.

- 65% mendojnë se në lidhje me programet për zhvillimin e grave dhe vajzave, Bashkia Pukë nuk ka zhvilluar programe për rastet e dhunës në familje dhe mungojnë programet për rritjen e kapaciteteve të grave dhe vajzave, në mënyrë që të përgatiten për tregun e punës, kjo sidomos në zonat rurale.
- 75% e të intervistuarve kërkojnë lehtësim të taksave dhe pagesave të ujit dhe dritave.
- 50% nuk kanë informacion në lidhje me mbledhjet e Këshillit Bashkiak, (kjo ka të bëjë me neglizhencën pasi pjesa përdoruese e rrjeteve sociale mund ta gjejë informacionin online).

## Rekomandime

- Të bëhet kthimi në banesa për të gjitha familjet e pallatit të NSHN<sup>së</sup> ;
- Të parashikohet vendosja e dy vetratave të reja në pallatin afër Drejtorisë së Policisë;
- Bashkia të shikojë me prioritet çdo ankesë të banorëve të saj e për pasojë të evidentohet dhe riparohet lagështira që krijohet në katin e parë të pallatit të “ish furra e bukës”, ngjitur me godinën e Bashkisë;
- Të fillojë hartimi i një strategjie apo plani zhvillimi vendor për punësimin e të rinjve dhe grave;
- Të ndërtohen grupe pune që evidentojnë problemet e zonave rurale dhe të ndihmojnë në përgatitjen e aplikimeve për skemat e ndryshme të mbështetjes së fermerëve;
- Këshilli Bashkiak të ndërtojë mekanizma të gjithpërfshirjes qytetare në vendimmarrje;
- Nevojitet më tepër bashkëpunim me organizatat jo fitimprurëse dhe grupet e interesit, për të zhvilluar një proces efektiv konsultimi dhe të dëgjësive publike;
- Këshilli Bashkiak mund të realizojë marrëveshje ose memorandume bashkëpunimi me organizata dhe grupe interesi, për nxitjen e pjesëmarrjes së qytetarëve në vendimmarrje, duke bërë procese efektive dhe transparente.

## Anekse

### Aneks 1: Prioritetet e kontratës Sociale

**Prioritet 1:** Programet e Bashkisë për nxitjen e punësimit të prioritulojnë grupet më pak të avantazuara në tregun e punës:

- Të rinjtë e sapo diplomuar
- Gratë
- Gratë viktime të dhunës në familje

**Prioritet 2:** Adresimi me prioritet i rregullimit të rrugëve në nivel bashkie.

**Prioritet 3:** Adresimi me prioritet i vendosjes së transportit publik, sidomos në ato zona ku mungon totalisht.

**Prioritet 4:** Adresimi dhe listimi prioritar për ngritjen e shërbimeve për grupe në nevojë për shërbime të kujdesit shoqëror.

**Prioritet 5:** Ngritja e programeve dhe organizimi i fushatave ndërgjegjëse kundër dhunës me bazë gjinore.

**Prioritet 6:** Unifikimi i shërbimit dhe cilësisë së pastrimit për të gjitha zonat që janë pjesë e bashkisë Pukë. Shtimi i koshave në Njësitë Administrative dhe zonat periferike ku mungojnë dhe kontroll më i shpeshtë nga Bashkia.

**Prioritet 7:** Adresimi dhe rregullimi i furnizimit me ujë të pijshëm i shkollave dhe fshatrave si dhe kontrolli i cilësisë së tij.

**Prioritet 8:** Buxhetim me pjesëmarrje në mënyrë që, qytetarët të marrin pjesë në vendimmarrjen mbi menaxhimin e financave publike të pushtetit lokal.

**Prioritet 9:** Ngritja e akademisë sportive (zhvillimi i shumësporteve për aktivizimin rinor).

**Prioritet 10:** Lobimi dhe mbështetja nga Bashkia në lidhje me bursat e ekselencës.

**Prioritet 11:** Nevoja për hapjen e kurseve profesionale me bazë zhvillimin e aftësive për turizëm, si një fushë prioritare e zhvillimit të Pukës, duke sjellë kështu edhe rritjen e punësimit të të rinjve dhe grave.

**Prioritet 12:** Zhvillimi dhe identifikimi i zonave turistike, tabelave informuese, shtigjeve malore dhe informacion më të zgjeruar për zhvillimin e zonës së Pukës.

**Prioritet 13:** Kërkesa për të hapur një Qendër Rinore.

**Prioritet 14:** Rishikimi i ndihmës ekonomike, veçanërisht për gratë kryefamiljare, të divorcuara dhe ato të dhunuara.